

Vischnaunca da Mustér

Lescha da pumpiers

2015

I. Determinaziuns ed incaricas generalas

- Art. 1 Finamira
Art. 2 Pumpiers, 1. incaricas

II. Obligaziun da prestar survetsch da pumpiers

- Art. 3 Pumpiers, 2. obligaziun
Art. 4 Deliberaziun dil survetsch activ
Art. 5 Deliberaziun dall'obligaziun da prestar survetsch
Art. 6 Relaschada anticipada

III. Organisaziun

- Art. 7 Survigilanza suprema
Art. 8 Suprastonza communal
Art. 9 Obligaziun da survetsch
Art. 10 Segirada

IV. Alarmaziun e seracass

- Art. 11 Alarmaziun
Art. 12 Persunal da vischnaunca

V. Survetsch d'exercezi

- Art. 13 Survetsch d'exercezi
Art. 14 Dretg d'access

VI. Finanziaziun

- Art. 15 Taxa da cumpensaziun

VII. Disposiziuns penelas

- Art. 16 Cuntravenziuns
Art. 17 Exclusiun

VIII. Mieds legals

- Art. 18 Instanzas

IX. Disposiziuns finalas

- Art. 19 Execuziun

Sebasond sin artechel 26 alinea 3 dalla lescha davart il schurmetg preventiv encunter incendis e dils pumpiers dil Grischun (BR 840.100) relai la vischnaunca da Mustér, sin fundament da sia constituziun communal e dils statuts dalla corporaziun Pumpiers Sursassiala, la suandonta lescha e concluda:

I. Determinaziuns ed incaricas generalas

Art. 1 Finamira

Questa lescha regla las incaricas e l'organisaziun dils Pumpiers Sursassiala aschilunsch ch'ils pensums e las responsablads ein buc adossai ad organs cantunals ni reglai entras ils statuts da corporaziun.

Art. 2 Pumpiers, 1. incaricas

La basa da pumpiers ha en general l'incumbensa d'impedir e cumbatter donns. Ella presta immediatamein agid, oravontut tier:

- incendis ed explosiuns;
- catastrofas da natira;
- tscherca e salvament da carstgauns ed animals;
- eveniments che donnegeschan ni pericliteschan igl ambient;
- acziuns el senn dil schurmetg dalla populaziun.

Sper la prevenziun da donns sa la suprastanza communal clamar ils pumpiers encunter indemnizaziun ad ulteriurs survetschs ed acziuns el cass che:

- la savida dil fatg e digl equipament dils pumpiers ei necessaria;
- las acziuns selaian s'accordar cul pensum principal,
- la promptadad allas incaricas primaras sura ei garantida nuninterruttamein.

Cun lubientscha dall'Assicuranza da baghetgs dil cantun Grischun sa la vischnaunca ademplir incumbensas en fatgs da pumpiers ensemen cun vischnauncas vischinas.

II. Obligaziun da prestar survetsch da pumpiers

Art. 3 Pumpiers, 2. obligaziun

Obligadas da prestar survetsch da pumpiers ein personas domiciliadas tenor dretg civil sin intschess dalla vischnaunca.

L'obligaziun da far pumpiers entscheiva all'entschatta digl onn ch'ins cumplenescha il 21avel onn da naschientscha e finescha alla fin digl onn ch'ins ha cumplenu il 45avel onn da naschientscha. La suprastanza communal sa extender la vegliadetgna da survetsch ensiviers tochen al 55avel onn da naschientscha cumplenu, sch'il diember effectiv tonscha buc.

L'obligaziun da far pumpiers vegn ademplida cun in survetsch da pumpiers activ ni cun pagar ina taxa da cumpensaziun. Negin sa pretender da vegnir partius el survetsch activ.

La suprastonza dalla corporaziun decida sin proposta dil cumandant tgi ch'ei obligaus al survetsch activ. Leutier vegn giudicau tenor ils suandonts criteris:

1. la qualificaziun persunala;
2. la contonschibladad;
3. il basegns pertuccont igl effectiv reglamentau.

Per sclarir la qualificaziun da survetsch sa il cumandant ordinar da tuttas uras ina controlla medicinala tier in miedi da confidanza.

Art. 4 Deliberaziun dil survetsch activ

Dil survetsch activ da pumpiers, denton buca dalla taxa da cumpensaziun, ein deliberai:

- a. persunas ch'exequeschan funcziuns officialas ch'ein buca cumpatiblas cull'obligaziun dil survetsch activ;
- b. persunas che san cumprovar impediments corporals;
- c. persunas che fan part d'ina organisaziun da cazzola blaua.

Davart cass da dubi decida la suprastonza dalla corporaziun.

En cass motivai sa la suprastonza communal, suenter haver consultau la suprastonza dalla corporaziun, deliberar ulteriuras gruppas da persunas dil survetsch activ.

Art. 5 Deliberaziun dall'obligaziun da prestar survetsch

Dall'obligaziun da prestar survetsch da pumpiers e dalla taxa da cumpensaziun ein deliberai:

- a. ils commembers dalla suprastonza communal;
- b. spirituals e commembers d'in uorden religios;
- c. persunas cun ina menda spirtala cumprovabla;
- d. in bab ni ina mumma ch'educhescha persuls affons sut 17 onns;
- e. mummas duront il temps da gravidonza e tochen in onn suenter la pigliola;
- f. persunas che prestan survetsch activ en in corp da pumpiers da menaschi renconuschiu dil cantun.

Tier duas persunas che vivan en in partenadi el medem tenercasa cun affons che van aunc buc a scola ni che frequentan la scola ordinaria ei mo ina persuna obligada al survetsch da pumpiers. Per quintar la fin dil survetsch da pumpiers decida la vegliadetgna dalla persuna cul gudogn principal.

Davart cass da dubi decida la suprastonza dalla corporaziun.

En cass motivai sa la suprastonza communal, suenter haver consultau la suprastonza dalla corporaziun, deliberar ulteriuras gruppas da persunas dil survetsch activ e dalla taxa da cumpensaziun.

Art. 6 Relaschada anticipada

Sch'in attestat d'in miedi da confidanza cumprova che la persuna obligada al survetsch sa buca pli prestar el futur survetsch activ, finescha quel. Persunas deliberadas per motivs medicinals han da pagar la taxa da cumpensaziun.

III. Organisaziun**Art. 7 Survigilanza suprema**

La suprastonza communal exequescha la survigilanza suprema dils pumpiers. Ella deleghescha quella, ultra dallas stipulaziuns en artechel 8, alla suprastonza dils Pumpiers Sursassiala.

Art. 8 Suprastonza communal

La suprastonza communal ha oravontut las suandontas cumpetenzas:

- a. fixar il cuoz da survetsch tenor art. 3 da questa lescha;
- b. deliberar persunas tenor art. 4 e 5;
- c. fixar la taxa da cumpensaziun dils pumpiers tenor art. 15 da questa lescha en concordanza cullas ulteriuras suprastonzas communalas;
- d. confirmar relaschadas anticipadas dil survetsch activ;
- e. decider davart fatgs che cumpetan buc ad auters organs.

Art. 9 Obligaziun da survetsch

Ils pumpiers ein obligai da dar suatientscha al clom da far pumpiers.

Els han d'exequir las lavurs surdadas ad els.

Els san vegnir obligai da frequentar scolaziuns e da surprendre scharschas da cader. Els han da visitar ils cuors ed exerchezis corrispundents e da prestar ils survetschs ch'ei colligai cul grad ni culla funcziun.

Tgi ch'absolva en in onn buca silmeins la mesadad dils exerchezis ordinaris sto pagar la taxa da cumpensaziun cumpleina.

Art. 10 Segirada

La Corporaziun Pumpiers Sursassiala pretenda che las persunas che prestan survetsch en siu corp da pumpiers seigien segiradas commensuradamein encunter consequenzas finanzialas dad accidents e malsognas en connex cul survetsch da pumpiers e ch'ellas disponien dallas informaziuns necessarias en caussa. La suprastonza dalla corporaziun sa pretender documents e confirmaziuns corrispundent(a)s.

IV. Alarmaziun e seracass

Art. 11 Alarmaziun

Scadin ei obligaus d'alarmar ils pumpiers cun il clom d'urgenza 118, sch'el observa in cass da donn.

L'alarmaziun dils pumpiers succeda tras il sistem d'alarm dall'Assicuranza da baghetgs cantunala. La corporaziun metta a disposiziun als pumpiers eventuals apparats necessaris.

Art. 12 Persunal da vischnaunca

Il persunal da vischnaunca, sco il cau dils survetschs technics, il cau-serenera ed il forester stattan tenor pusseivladad a disposiziun al meinacziun sch'ei fa da basegns. Il responsabel d'aquaducts procura per avunda aua da stizzar. In menaschi d'urgenza en consequenza da lavurs da reparatura ni manteniment vid igl aquaduct ei da planisar ensemen cul commando da pumpiers.

V. Survetsch d'exercezi

Art. 13 Survetsch d'exercezi

Mintga persuna che presta survetsch activ retscheiva all'entschatta digl onn da survetsch in plan d'exercezis. Quel vala sco camond al survetsch. En cass che survetschs ston vegnir stuschai, vegn quei communicau allas personas pertuccadas.

Art. 14 Dretg d'access

Ils habitonts resp. ils proprietaris d'in edifices ein obligai da schar exercitar en ni vid lur object e da schar entrar en quel ils pumpiers entochen allas 21.30 uras.

Ils objects d'exercezi ein d'utilisar cun grond quitau. Tier l'elecziun dils objects ein ils proprietaris resp. ils habitonts d'informar ad uras. Igl ei da prender risguard dad eventuals cass da malsogna e dad autras circumstanzias specialas.

VI. Finanziaziun

Art. 15 Taxa da cumpensaziun

Persunas obligadas che prestan negin survetsch activ da pumpiers ston pagar ina taxa da cumpensaziun annuala. Termin da tagl ei ils 30 da settember. Ei dat negins quens pro rata.

La taxa da cumpensaziun munta silmeins frs. 300.00 e sil pli bia frs. 500.00. Students ed emprendists entochen 25 onns pagan negina taxa. Sur 25 onns ei l'entira taxa debitada.

Per dimorants dall'jamna sa la suprastanza communal conceder ina reducziun. Sclaus d'ina tala reducziun ein dimorants dall'jamna sin intschess dallas vischnauncas da corporaziun. En conflicts cun auters cantuns ei il domicil da taglia decisiv.

L'altezia dalla taxa da cumpensaziun sedrezza tenor ils basegns dil corp da pumpiers e vegn impundida per las incaricas da pumpiers.

VII. Disposiziuns penelas

Art. 16 Cuntravenziuns

Tgi che cunterfa allas prescripziuns da questa lescha ed al regulativ da menaschi, vegn punius dalla suprastanza dalla corporaziun cun ina multa d'entochen frs. 1'000.00.

Art. 17 Exclusiun

Tier surpassaments grevs ni repeti encunter la lescha da pumpiers ni encunter camonds dils superiors, sco era survetsch nunsufficient, sa, sper la puniziun corrispudenta, era vegnir disponiu l'exclusiun dil survetsch activ. Davart l'exclusiun dil survetsch activ decida la suprastanza dalla corporaziun sin proposta dil commando e suenter haver consultau la suprastanza communal.

Persunas exclaussas dil survetsch activ han da pagar la taxa da cumpensaziun.

VIII. Mieds legals

Art. 18 Instanzas

Encunter conclus e disposiziuns dalla suprastanza dalla corporaziun ni dalla suprastanza communal sa vegnir recurriu enteifer 30 dis alla Dertgira administrativa dil cantun Gischun.

IX. Disposiziuns finalas

Art. 19 Execuziun

Il regulativ da menaschi regla l'organisaziun dils pumpiers e las cumpetenzas corrispudentas. Il regulativ da menaschi vegn approbaus dalla cumissiun da menaschi.

Approbau dil cussegl da vischnaunca ils 12 da december 2014. Cunquei ch'igl ei buca vegniu instradau in referendum, passa la lescha en vigur cugl'emprem da schaner 2015.

Cun l'entrada en vigur da questa lescha vegnan tuttas prescripziuns communalas che stattan en cuntradicziun cun ella cassadas, specialmein la lescha communal da pumpiers dils 22 da zercladur 2008.

Il president communal:

Il canzlist communal:

Francestg Cajacob

Andri Hendry

Approbau dall'Assicuranza d'edifecis dil Grischun tenor decisium dils 14 d'avrel 2015.

Il directur:

Igl insptectur cantunal
da pumpiers:

Markus Feltscher

Hansueli Roth